

Andrea Bezzola : 11 november 1905, 1 settembre 1963

Autor(en): **Messmer, Domenica**

Objekttyp: **Obituary**

Zeitschrift: **Annalas da la Societad Retorumantscha**

Band (Jahr): **77 (1964)**

PDF erstellt am: **16.05.2024**

Nutzungsbedingungen

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

Haftungsausschluss

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.



Alvin

Andrea Bezzola

** 11 november 1905, † 1. september 1963*

da Domenica Messmer

Sül sunteri süsom da San Peter a Samedan, güst in fatscha a la porta d'baselgia, ais la fossa d'Andrea Bezzola, d'ün dals meglers dals noss cha la mort ho trat a se. Üna massiva crusch da lain porta sieu nom. Quista avaro da prümavaira fat sieu servezzan e gnaro rimplazzeda cun ün bel crap. Ed eir sün quel saro scrit:

Andrea Bezzola 1905 — 1963

Üna fuolla d'glieud ais raduneda sün piazza Planta als 5 settember 1963, in quel di grisch, plövgius. L'urna vain missa per terra e cuvierta cun craunzs da tuotta bellezza. L'«Engiadina» e'l Cor viril chauntan. Afflicts ed abattieus seguinsa als chars cun craunzs e craunzs e'ns chattains in baselgia cun quella schurma d'glieud chi do l'ultima onur a quel chi ais partieu per adüna. Tuot taidla cun cour commoss il chaunt dal Cor mixt e'ls plets da cuffüert e d'undrentscha spüerts dals signuors ravarenda J. Michael e president cumünel G. Lazzarini.

Tuot pera irreel, ün greiv sömme. Nun eira Andrea Bezzola be l'oter di auncha in persuna in nos sunteri? Schi, als 31 avuost eira'l auncha gnieu aint da Cuoir a per cumpagner sü San Peter a sieu amih Toni Kaiser. E nus avaivans auncha baderlo cun el pocha pezza aunz cu ch'el s'avaiva instrado vers la staziun. Cha'l tuorna bainbod darcho in Engiadina, dschaiva'l, ch'el hegia cò püssas incumbenzas chi l'aspettan: Fundaziun Planta, Pro Lej da Segl, Ouvres electricas d'Engiadina bassa, Piazza d'aviatica etc. e ch'el s'allegra da gnir a ster darcho ün pô a Samedan. El ais turno, ma na per pudair metter sieu ampel savair e sieus prezius duns danouvmaing in servezzan da nossa val, da sieus abitants, da nossa lingua e cultura. Il Tuotpussaunt avaiva destino differentamaing.

Il di zieva, la dumengia mamvagl dals 1. september eira'l alvo da bun anim. El avaiva cruschino e tadlo musica, gianto illa prüveda

cumpagnia da sia chera duonna e decis da fer üna spassageda vers il Fürstenwald. Sün via, poch töch davent da sia dmura, l'ho azievo luot luot il mess da la mort. Ed el l'ho sgür sentieu daspera ed ais gnieu surprais d'ün tschert melessier. Perche immez ils progets ch'el explichaiva a sia ameda duonna as ho'l interruiot cun dir: «Eau vuless il pü gugent d'archo turner a chesa . . .» Sieu giavüsch s'ho accumulieu be memma spert, ma na scu cha el e nus tuots avessans gieu gugent; el ais turno a chesa müe e mort. Ün cuolp avaiva miss l'ultim tierm a sieu chamin. Il meidi accuors nu l'ho pü pudieu salver. «Andrea Bezzola ais mort!» Scu la bischa s'ho quista nouva deraseda illa chapitela retica, in Engiadina ed in tuot il Grischun, schi eir surour ils pü strets cunfins da nossa patria ed ho chaschuno dapertuot granda melavita e profund cordöli. Perche cun Andrea Bezzola eira partieu per adüna ün cher marid, ün bun frer, ün cordiel amih, ün umaun charitataivel, ün hom da character e cultura.

Andrea Bezzola ais naschieu als 11 november 1905 a Samedan. Nus vzains auncha ad «Andraja» ed a sia sour ad ir aint ed our da Quadratscha, a passer sü da la vietta da la baselgina inglaisa a scoula, a giuver sün piazza cun cumpagns e cumpagnas. Pü tard frequainta Andrea il Lyceum Alpinum a Zuoz. El ais ün bun scolar, s'interessa per tuot ils rams da scoula, imprenda bain ed ho speciel dalet vi da la matematica e vi da la musica. El frequainta alura la Scoula chantunela a Cuoir, as resolta da's dedicher a la giurisprudenza, stüdgia a Turich ed a Genevra ed absolta sieu temp da pratcha a Horgen tal tribunel districtuel. Lo fo el la cugnuschentscha da duos homens prominents, da dr. von Wyss, parsura dal tribunel, e da dr. Guldener, duos giurists da nom chi dvaintan alura sieus amihs. Turno a Genevra conclüda el sieus stüdis e doctorescha l'an 1936. Sia dissertaziun porta il titul «La responsabilité du débiteur à raison du dommage causé par ses auxiliaires dans l'exécution d'une obligation» (art. 101 c. o.). Quista lavur scritta per frances dal student da lingua rumantscha chatta grand' arcugnuschentscha e vain perfin distinta cul premi Bellot. Da quetaunt s'allegria Andrea fichun. El avess tuot las premissas e pussibilteds vulidas per fer üna briglianta carriera scu giurist, ma il devoir il clama a chesa, a Samedan, scu pozza da sia mamma. El assumma voluntusamaing sieus dovoirs scu figl e metta gugent sieu vast savoir in servezzan da sia ameda vschinauncha natela e da sia patria pü stretta. El as lascha tscherner scu nuder dal Circul d'Engia-

din' ota ed accumplescha düraunt 18 ans cun fidelited sias incumbenzas. Già l'an 1943 dvainta el cusglier cumünel e's prasta ün decenni a la lungia scu viceparsura da Samedan. Que ais cler, cha l'advocat intelligiaint e bainvugliaint chatta in Engiadin' ota ün grand champ d'activited. Numerusas ledschas e püs reglamaints our da quel temp daun auncha hoz testimonianza da sia instancabla e diligiainta lavur per nossa vschinauncha.

Andrea Bezzola dvainta eir güdisch districtuel. El ais ün conscienzchus e premurus trueder cha tuot stima ed appredscha. Chapi-bel scha'ls votants da nos circul daun a quist hom da character e da fin sentimaint lur vusch scu grandcusglier. Eir aint il Grand Cussagl s'acquista il rapreschantant dal pövel engiadinais la fiduzcha e'l respet da sieus collegas chi'l vöglian bain pervi da sieus votums bainfundos e sieu fer conciliant, pervi da sieu sen da respunsabilted e sia objectivited. El nu piglia suvenz il pled, el ponderescha duos voutas aunz cu s'externer, ma cur ch'el as fo udir, tschercha el bunas soluziuns per tuot ils problems als quèls el vo fich a fuonz, e sia mira ais adüna quella da pruver da bunier ed applanir ils cuntrasts e las difficulteds politicas. L'an 1956, cur cha sar dr. Arno Theus vain tschernieu aint il Cussagl da stedis, propuona il Partieu democratic sieu commember Andrea Bezzola scu candidat per la perioda d'uffizi chi vain vacanta per ses ans e mez aint il Pitschen Cussagl. Il pövel grischun il tscherna onurificamaing cun 12 932 da 13 741 vuschs. Bezzola accepta la tscherna e surpiglia il Departamaint d'educaziun e da sanited. Düraunt ils ans 1959 e 1962 presidiescha el nossa Regenza.

El lavura instancabelmaing, cun sistem e success, svia polemicas infrütaivlas e luottas inütilas, ma as dosta cun persvasiun per que ch'el retegna per bön ed a favur da la generalited. Bger da fer al do la nouva ledscha da scoula. Ans ed ans eiran las lavuors preparativas restedas aint ils chaschuots dals regents. La ledscha dal 1859 stuvaiva finelmaing gnir renoveda ed adatteda a las relaziuns dal di d'hoz. Dr. Bezzola as metta cun chüra e curaschi vi da la lavur spinusa ed ingrata. El so cha que vularo upas per gnir a bröch, ma el stüdgia a fuonz tuot las dumandas e pussibilteds, el as cussaglia culs commembers da sia cumischiun d'experts e culs perits, el scriva artichels, salva referats, discuta sur da las innovaziuns progettedas e nu ceda. Que al cuosta bgeras bgeras uras da lavur da di e da not e dumanda forzas e perseveranza, pustüt eir per metter our d'via l'opposiziun cunter la

scoula interconfessiunela dal stedi. A la fin ais la ledscha redatta in tuots detagls per la votaziun. Il pövel grischun l'accepta. Andrea Bezzola s'allegra da tuot sieu cour da quetaunt, e sainza perder temp as metta el a rediger eir la nouva ledscha per las scoulas medias ed otras ledschas chi haun da gnir revaisas: la ledscha pel fliamaint d'amalos, la ledscha pels stipendis, la ledscha da vaccinaziun ed otras pü. La Scoula chantunela ho da gnir ingrandida, ed a sun da piglier numerusas dispusiziuns cha'l regent Andrea Bezzola visescha cun saun güdizi e radschunaivlezza.

Ma melavita s'approsma il temp da sia activited scu cusglier a la fin. Als 31 december dal 1962 stu nos cusglier guvernativ Andrea Bezzola as retrer. Que dicta la constituziun chantunela. «Eau avess gugent glivro auncha ün pêr fatschendas cumanzedas, sch'eau avess pudieu. Mia lavur am daiva granda satisfacziun, schabain ch'eau d'he gieü da morder giò bgers disgusts, ma eau d'he fat que ch'eau d'he savieu e pudieu.» Que ans dschet il trapasso ün di a sieu retuorn da l'America. Zieva avoir banduno noss' executiva chantunela s'avaivan Andrea e sia muglier miss in viedi per l'America dal süd ed eiran eir ieus a chatter il cusdrin a Lima (Peru). Quaunt ch'el ho savieu da'ns quinter da que bel ed inschmanchabel viedi! El eira inchanto da tuot que ch'el vaiva vis ed experimento. Eau il vez auncha cu ch'el relataiva entusiasmo da Rio de Janeiro, la cited chi saja sgür la pü bella da tuot il muond. El vulaiva eir ans referir auncha ün di pü in lung ed in larg dal grand viedi.

Eir per nossa Lia Rumauntscha vulaiva el as sfadier. El avaiva surpiglio il presidi be pochs mais aunz ed eir cumanzo a schlier ils problems ad el cuntschaint da sieu temp d'uffizi. La Fundaziun Planta spettaiva sün l'assistenza dad Andrea Bezzola. A la Pro Lej da Segl vulaiva el eir güder our da l'imbarraz. Il Grand Cussagl l'avaiva attribuieu l'incumbenza da's praster scu suppleant dal tribunel chantunel, e per l'Uffizi d'achüsadur public avess Andrea pudieu auncha fer fich bger.

Las forzas vitelas dad Andrea Bezzola eiran però consümedas. Poch temp zieva avoir surpiglio sia activited scu cusglier guvernativ avaiva el subieu ün' attacha dal cour e stuvieu as render in chüra medica a l'ospidel. Grazcha al premurus fliamaint ed a la granda chüra a chesa s'avaiva il pazchaint remiss fich bain, e nus nun avessans mê pü cret, cha la mort al füss telmaing süls chalchagns.

Cher Andrea, Tü ans hest bandunos bger memma bod, seguond
nossa previsiun umauna. Tü est partieu our d'immez Tia activited,
scu ün meritaivel e bainvis magistrat chi ho prasto bger a bön da
pövel e patria. Nus tuots At savains grô per que cha Tü hest fat per
pitschen e grand, per rich e pover, per giuven e vegl, per vschinauncha
e per chantun, per nossa patria intera ed intratta. Cun cour contristo
pigliains nus per adüna cumgio da Te. Nus At tgnarons in undraivla
memüergia ed At giavüschains il merito quaid repos etern.